

Pretendì dapli engaschi dal chantun

Ils deputads rumanschs pretendan in meglier resguard dal rumantsch en la nova constituziun

■ (mc) Il chantun Grischun duai s'engaschar dapli che fin qua per la promoziun ed il mantegniment dal rumantsch. Quai pretenda la gruppa rumantscha dal cussegl grond en connex cun la revisiun totala da la constituziun chantunala.

La gruppa rumantscha presidiada da *Robert Giacometti* è s'exprimida en ina votaziun consultativa en favur d'in pli ferm engaschament e d'ina pli gronda responsabladad dal chantun en dumondas da linguatg. En il sboz da la nova constituziun aveva la regenza vuli surdar la cumpetenza da fixar il linguatg uffizial e da scola a las vischnancas. La regenza aveva motivà sia tenuta reservada e precauta cun la pasch da linguatg e cun l'autonomia communal.



Per Robert Giacometti (dretg) e Corsin Farrer è la finamira da cuntanscher in meglier resguard dal rumantsch en la nova constituziun chantunala ina emprima sfida per la nova gruppa rumantscha.

FOTO M. CABALZAR

La LR ha dentant rendì attent il chantun ch'el na possa betg ignorar sia responsabladad politica, surlaschond questa dumonda impurtanta be a las vischnancas ed uschia savens a la casualità. «Il chantun sto surpigliar dapli responsablad, betg sco dicat, mabain sco sustegn a las vischnancas», ha punctuà *Jost Fallett*. La subcumissiun presidiada da *Vincent Augustin* vul tegnair quint da quest postulat cun pretender che las vischnancas decidian «en collavuraziun cun il chantun» davart la lingua uffiziala. Sco quai che *Eveline Widmer* ha intunà fiss er la regenza d'accord cun questa formulaziun ed ella metta er en vista ina nova lescha da linguas che resguarda ils postulats da la Rumantschia.